



# Chamna Am

(A Monthly Organ of the Evangelical Synod Church)

Vol. XXXVI

No. 4

July, 2020



2020  
KUM  
THUPI:

"NA INSUNG HIHTUP IN"  
ISAI 38:1

Editor: Rev. T. Kamgin Gangte

**Vol. XXXVI No. 3  
July, 2020**

## Editorial Board

**Chairman:**  
Upa Dr. L.S. Gangte, M.A. M.Phil.

**Editor:**  
Rev. T. Kamgin Gangte, M.Th.

**Asst. Editor-cum-Circulation Manager**  
Rev. Khaitinthang

**Bible Study:**  
Pr. Khailalsiem M.Th.  
Evan. Paukhomang B.D.

**Contributing Editor:**  
Upa Paozalun BA  
Rev.Khaigin BD  
Rev. L.Sata B.Th.  
Rev. Thangkhosemi M.Div.  
Rev. T. Kampu M.Th.  
Rev. Henkholien MBS  
Miss Chinbawi MRE

<b>Editor ana hite</b>	
1. Upa Lalkhogin	1986
2. Rev. Khaigin Gangte	1987-2005
3. Rev. Lamkawsat	2006-2013
4. Rev. Thangkhosemi	2014-2017

## contents

- Editorial..... 01
- "... A thih phet in kuomah a it a um puou ui..." ..... 02
- Lalpa lenggam ah nang leh kei mawhpuk .... 05
- Krista hungkitna ding..... 10
- Hehpihna thuchah..... 12
- Lockdown Revival..... 15
- India-China gamji a buoina ..... 21
- Thutak bang ahi?..... 24
- Hipi natna hi Lalpa sapna aw dan in i ngai um? ..... 26
- Pauchamna a het ding ..... 27
- Thaithak thuchah ..... 29
- Nungak ginum ..... 31

- Kumkhat lakman Rs. 200/-
- Thusuoh nuom nei te'n ESC Office Post Box-54, Chiengkawnpang, Churachandpur a thak ding.
- Ala nuom leh a man pie nuom te'n circulation Manager, hetsak ding.
- Thukisuh cheng hi ESC Ngaihdan ahi vek khel puoi. Article zikte'n a mawh a kipuok chiet ui.

### CHAMNA AW PHUNGVUKNA DING

1. Chief Patron	-	₹ 5000.00
2. Patron Member	-	₹ 4000.00
3. Diamond Member	-	₹ 3000.00
4. Gold Member	-	₹ 2000.00
5. Silver Member	-	₹ 1000.00

PRINTED AT  
THAWNSAAU PRINTING WORKS  
CENTRAL LAMKA

## EI SAWLPA NA HIH

EI: “EI” kitih thumal hih kawk chuom chuom in a gentheih ahi. chun, mathielh theih le ahi. Zie hi genchien ding hitabang leng, a grammar dan tak chun First person singular ahi tih ding hintin. “Ei haw/ Ei uh” tih ahihtak leh First person plural tih theih ahi zêl hi. A chunga thupi ipiek hi chuh mikhat kamsuok ahih a chien hi.



SAWLPA: “SAWLPA” kitih hih kuo ahim khat genna ahi a, zie kuo ahim khat chuh **Pathien** kawksak dinga zie article hi guonggalh ahi.

A thupi kipie “Ei sawlpa na,” kitih i sim leh kipah um taka lak theih le ahi a, Iplah tak kampau leh chimchâk huoi tak kampaua le ngaih theih zêl ahi, mahleh thu kipah um tak leh ngaihnat um mahmah ahi ti nuom ihiu hi.

Ei sawlpa na chuh bang ahi a, bangti sep ding ahim tih hi nang le kei in i kihet a ngaia, zie na chuh ikihet chien kei tak leh bangti sep ding ahim, tih chu i het zuipek ngaikit ahi.

Mihing khata I hung pien ngal leh sawl a umloh tih chu um theilo ahi, kitileh kigen khiel puo’na. Pathiena ana hat mahmah, I mi masa teu haw chanchin I gen mangmawh hawu hi sawl ahih uh akiheu a bangti sep ding ahih aheu a sep le a sme ui. Tuni tienga hi Pathien lama kitilkouoh na a kimang zing zing ahi tai. Sâwl ahih lamlam kihetlo le chu um theih mah mah ding ahi. Chun, sâwl ahih kihe mahmah ngaihsaklo le um thei kit tho ahi.

Tuni hin Sapchuom tin leh mimal tin in eimah sie le pha hetna manga khawsa iihh nau ahin eimau mimal phatchuomna ding chuh alotheilo khat ana hi zieng ta mawng lele, kuo ahim khat phatchuomna dinga hinkhuo mat hi Pathien ei sawlpa deih lam ahi. Sâwla I umna haw hi sumsiello ding chuh adiek taka gingtu te hi kih ahi. Mihiem khat hihna lam achun titlohma leh taklohma bei chuh um puona. Zie titlohma leh taklohma hin kuomah achawk buoi zaw puo a, buoina kiti hi ei sawlpa na hepha lo a, ei mah ût thu thu a lunggel ahih phat phat leh hichaup sek ahi.

“Thilphalo lak ah kikieng kawih ah,” tih hi kuo cheng a dinga kideihsakna kampau ahi. Ei sâwlpa hin deihsakna bei in ei sâwl hiel puo’na. Ei sâwlpa deihdan ngaihsak lo a thilphalo laka iki kiengkawih zawhlloh phat phat leh haksatna mun buoina mun haw, chawplut lohna dingkhat ah I va chawplut lawh sek ahi. Zie tak chuleh ei sawlpa nasem chuh kihi talo in seploh ding pen vasemkha kihi sek ahi. EI SAWLPA NA HIH, bang NA ahim tih hethei ding in I bawn chau in Lalpa’n ei vangsa k ta hen...



## “... A thih pheṭin kuomah a it a um puou ui...”

(2 KHANGTHUBU 21:20)

*By: Pastor Khailalsiam*

**G** uol lui te chun, mihingte a ding in hinkhuo ahin hun pawimawh tak tak hun thum a um hi ana tiu hi zie haw chuh , Pienni, Zi/Pasal neih ni leh thih ni ahi.

Pienni leh Kawppih neih ni chuh va gensau dah hi tin, thihni hih vak ngaihtuoh khawm hitiu. Lusûn in ah kah thawm kizawklo na hih um bek ding in ginchak a um puoi. Mi phalo tawpkhawk a ngaih a umte le athih tieng uleh a kap ding chuh ana um tei sek hi.

Thihni a ei it a, ei ngaia kap ding hih, ana gel khalo te’n chuh bang in ngai khel puon a, ahin lah mi khen khat in ana ngaikhawk mah mah uh hi ding ahi. Nupi khat in, a

enkawl a Pa luong ka hun delh niu in, ka kawm ah, holimna ana nei a... Ka pa (amah pa tak chuh hilo – a enkawlp) hin ‘ka thih Ni leh ka luong chunga kap ding ka hun tih a hi’ atii, tih thu a gen a, lungthim a khawih ngei mai. Ngaina tu leh ittu neih a thih hih thil lul leh mantam tak chuh hi ding ahi.

Awle, a chunga I Bible chang tel hih I et veng veng chun, lungkhawih umtak leh thawmhauh um tak thil tung chuh ahi. Ka sim dawk ni’n

maksa tak in chawmkhat ka ngaihtuoh vung vung a, thil um theilo dinga ka na ngaihtuoh ahi a, Bible hiel in a gentle thil um thei mah mah hiding ahi tih ka hedawk hi. Zie ni apat chun, ka lungthim hin a bei thei puo a - Juda Leng Jehoram guol a I thih ni leh ‘kuomah a it umlo’ hih khak ding vang chuh thil lauh um tak ahi.

Leng Jehoram hih Juda leng 5na ahi a, kum 32 ahih in a lal pan, kum 8 sung lal in apang hi. Bang ziek lawm lawm a a thih ni a, a it umlo a, lengte than ale vuih a ana umlo ahim? ana en khawm titiu. A chanchin hih 2 Let. 8:17-21 sunga le a muh theih hi.

1. Mi huham leh lungsietna nei lo a hi. (2 Khangthhubu 21:4)

Leng Jehoram pa hih Leng Jehosaphat ahi a, Leng phatak leh fel tak, Pathien he leng ahi a, chun, Lalpa deihbang a lenggam ana siempha tu ahi.

Leng Jehoram hih a chate lak ah a upa pen ahi (v.4). A pa leng gam ahun luoh phet in, a suohpih te chengcheng chuh chemzam in a that suok kei a, chun Israel lawiupa tamtak te tawh a that khawm vek hi.

A suohpih te leh lawiupa te, lungsietna leh zahna tello a that ngam chun, midang chuh bangtieng tak in a bawl ngam ta dem, ngaihtuohna mawl pen ale het mai thei ahi. A leng gama mite'n le thuok ten ding ahih uchuh hetsa ahi.

Tulai khang hile I et veng veng chun, mi huham leh lungsietna neilo khang chuh ahi mai tai. Sawlchak Paul in Timothy kawm ah ‘ni nunung lam a’ thil hung um ding genna lak ale ana tel hi (II Tim. 3:1-5). Zie huham na leh lungsiet na neilo hin, Nulepa, sanga lien zagh zahlo na haw a huom tel vek hi. Huham taka, khawksak neilo a ngawng tawih leh lungsietna neiloa khawsak hih ‘thih ni a it tu umlo’ a um theih na chuh ana hi ngut ding a hi.

2. Lalpa mitmuh a thil phalo hih (2 Khangthhubu 21:6)

Thuching khat in ‘a chen khawmpih mihing bawn, lungsiet lo in bang tin Pathien a lungsiet thei dem?’ ati bang in, a suohpih leh lawiupa zahlo a that ngam Leng Jehoram in, Lalpa mitmuh in thil phalo tam tak a bawl hi.

i. Israel lengte thil gilo hih chuh a entawn a,

ii. Juda tanggam te a chun milim pathien hona munte a sa a, Juda mite leh Jerusalem a mite chuh Lalpa chunga thil gilo hih dingin a puimang ta a.

Khawk mah mah mai chuh, amah chauh a Lalpa mitmuh a thil phalo ana bawl hileh chuh, kipakpih um kilele ana pha deuh mai thei ahi a, ahin lah, leng ahih na ah a thuneihnha mangkhiel hiding ahi a, amipite le Lalpa chung ah thil gilo hih ding in a puimang zo ta ahi.

### 3. A thilhiah kхиela kisik lo (2 Khangthhubu 21:12ff)

Leng Jehoram chun, zie bang tuk a gitlo a bawl zing lai chun, Lalpa Thiemgau Elija'n lehkha a thak a, ama ban a thil hung tung ding haw agen sak hi. Zie lehkhathak hih Thiemgau Elijah thuchah zikthawh umsun chuh hi ding ahi. Thiemgau Elijah in, A pu a pa te um chan zuilo a, a um thu ah, mawh a chan a, a gitlohnna te ahetsak a, hipi a gawt a um ding thute a gensak a, ahin lah Leng Jehoram hin kisikna mawng mawng neilo in, 'ka

thih lele thi mai ka' ti hileh kilawm tak in a thih tieng in a kisik thu aki gen puoi. Khawk mah mah mai chuh ahi.

Pathien in gitlohnna ziek a gawt dingte haw hih, hilhawknna leh hetsakna anei masa tei tei sek hi. Kuole a gitloh kisik a Pathien lam a zawsit kit uchun, Lalpa zahngaihna a dim, lungsietna hau chun, angai dam zo mah mah hi. Thuthun Thak ah Chapa taimangpa (Luke 15) thusim ah a chien mah mah hi. Pathien apat a thuchah zak a, lochal taka um tei tei hih, 'it tu neilo a thih theihna ahi' tih hih a muhchien thei hi. Lalpa AW I zak chun, gitloh kisik a ei sudam thei leh ei ngaidam thei kawm zawsit chuh chatuon dam na ahi.

Awle, Leng Jehoram chanchin apat in, thu tamlo ivak holim khawm ua, khawvel mihing hih sietna a dim sa, phatna neilo chuh ihiu hi. Ahinlah, zie apat a damna ding chun Lalpa Pathien in a Chapa Isu Krista ei pie ta a, amah ah dam na kim a um a, mantam tak leh lul tak a ithih a, I hin kit theihna ding un, Krista nei in Amah ah chun um hiitu.

Masang achun, huham leh lungsietna neilo, Lalpa mitmuh

a thil phalo ngen bawl ina hi maithei hi. Ahinlah, kisiklo a Leng Jehoram guola I um chun, tu khawvel chauh hilo a, it tu neilo a um kumkhuo thei ahi. Zie ziekchun, hunpha I neipet hin gitlo kisik in, Lalpa kawm zuon leng – ‘A mi thiengthote thihna chuh lultak

ahi’ (Sam 116:15) atih bang in nang le kei thihna lultak hung hi ding ahi.

Khawvel in sietlam amanawh zing lai hin, Lalpa angsung bel hiting un, Lalpaleh mite’n it um leh ngaihum eisak theih tieng a hinga, thi ding in Lalpa’n A thu ei vangsak ta hen.



## LALPA LENGGAM AH NANG LEH KEI MAWHPUOK

(1 Lengte 12-13)

*By: Pastor Soial*

(Hun masa khan leng 1 Lengte 11 na a Solomon hinkhuo a kipat in “Na lenggam a bit nâm?” tih lehkazik (article) i na nei ua, tu’n amah zawh a leng hung umte akipat vak enkhawm kít hitiu.)

**L**eng Solomon thih zawh in a chapa Rehoboam in Israel gamsung ah vai a hawm pan tai tih Jeroboam in a zâk phet in, amah le Aigupta gama a taihmangna a kipat ahung vaikit ngal hi. Solomon in Israelte namkawl a gik sak ziek in, a sukgâng sak dan ding Jeroboam leh Israel kikhâwmkhawmte’n a ngaihtuoh pan tau hi. Mahleh,

zie thu chungchang a chun, leng Rehoboam in apa masanga ana ding sek upahaw thumawpna (mipi te thuzawp ding) ngailo in, a guolpihte thugen ngaitha zaw’n, mipite namkawl a sukgiksak zaw sêm hi (Lalpa thutiem guitarra ding in) (1 Lng.12:15). Zie ziekchun, Israel nam sawmte chu leng Rehoboam a kipat pawtdawk in, Jeroboam chu amau leng

ding in a kisiem tau hi. Upate haw thugen a ngaihsakloh ziek leh a guolpih tangvalte thugen a zuih ziek khan, nam sawmte'n lungchuom a gel ua, Rehoboam in a lenggam tamzaw a chān khawlawh tai.

Leng Rehoboam in upate thumawp a zuihloh zieka a gam lienzaw a chānna hin zilding tampi ei muhsak hi. Lehkha i hung thiem ta a, i hung kikhantit ta a, officer bang le i hung hita a, mahleh (leng Rehoboam bang a) tunia gochan i chan ding bang chang zolo leh, i chan te i chānsek naklai hih aziek um ding ahi. Nulepa pilepute thugen/thumawp haw banga i na sehloh ziek a, i sukna ding bang i sukloh hi mi tampi thiltuok ahih i gingchai. Zieziekchun, i sang a lienzaw zahdān zil a, a thumawpnau ngaihdau loh hi i lawhtitnau hiding ahi. Zie chuh ahi leng Rehoboam in a sukkhelh chu; apa kingakna upate haw thumawp kha ngaitha le chu a gam leh a mite chān khello ding ahi, mahleh a guolte ngaihdān a lak ziek in a go, apa a kipat a chante a mansak ta ahi. Zieziekchun i pu i pate kawm ah nang na upa taluo tai, na tek tai kitih theih malak in amau a kipat lunggel leh ngaihtuohnate lâk zawk ding ana hi ahi. Ei paunâk ah,

“ák êk tawh masa” i na tiu a, zie chu a thil tuokteu (experience) a kipat, asie leh apha ei hilhthei sek ua, zie chu azah um in apawmtâk ahi.

(v.20-33) Nam sawm (10) te'n Jeroboam leng a a kisiem zawh un, Rehoboam in gam chu lâkkît a guo a, mahleh Pathien mi Shemaiah kawm ah Pathien thu ahung bang in, Lalpa thu a zâwp ua, a vaikît hi. Rehoboam, Juda lengpa hi lungna mahleh, Pathien thu a zâk in Pathien thu bang in a tawi hi tih i mu a, thununna a neih dan i muthei ahi. Alangkhat a chun, Jeroboam in a lalgam chān ding leh a mite (nam 10 te) leng Rehoboam lama apan kit ding khâk uh lauhna'n “bâwngno lim nih” a pathien ding un a siemsak hi tih i mu ahi (Jerusalem lam ah a kithawih zingna lam un Rehoboam lam ah vaikit khan au tih a lauh ziek ahi). Bawngno nih te chu Aigupta a kipat hun puidawk pa, Pathien kha ahi ti'n, khat chu Bethel ah, khat chuh Dan ah a kawih hi. Zie chu Israelte a dinga gitlohma ahih na ban ah, zie mun a thiempu ding chun Levi chi hilo mivantângte a siem kît sawn nalai ahi. Juda gam a Kut a mat bang un, tha gietna ni sawmlenga ni chun Bethel ah maichâm a siem a, a thiempu

le a kawih a, maichâm gimlim hâl ding in amah ngei le ava chieh hi.

Tunia, leng Jeroboam hinkhuo a zie maichâm leh thiempu thilhîh a kipat hin thil muh leh zilding tampi aum hi. Bethel a maichâm bul a gimlim hâl dinga Jeroboam a kisak lai in, Lalpa thu chu Juda gam akipat thiemgau hung chun a kiko khum hi tih i mu ngâl ahi. Thiemgau in a kiko khum phet chun, leng Jeroboam in “Amah chu man un” ti’n a khut in avak bân a, mahleh a batna khut chu lehzûk kit theilo in azeng den mai hi. Chun, Lalpa thu a guitung ngîi hi tih melchikna’n le “maichâm hung khikek ding leh meivam kibuo vek ding” tih a gen chu aguitung ngal hi. Ziephetchun, leng chun a damkitna ding ti’n Lalpa kawm a ngetsak ding in thiemgau chu a ngen a, ama bang khan a damkit hi tih le i mu ahi (I Let.13:1-6). Zie thu akipat I muhdawk theih chu, Jeroboam kha leng hilele maichâm thil a akisaklahna hi Pathien a dinga thil gilo ahîhzie ei muhsak ahi. Chun, Pathien mi thiemgau thil gente aguitun zie i muh in Pathien thiemgau (Pathien nasemte) mawk zedap ding chi ahîhloh zie i muthei kit ahi.

Zie thil hihte haw hi leng Jeroboam in Israelte dinga

gitlohma a siemsak chauh hilo in, gitlohm amah ngîi in a bawl chu ahi. Milim pathien a siem, Levi chi hilo thiempu a siem leh maichâm siem dinga amah ngîi akisaklahna hi a gitlohma ahi. A thilhîh hi tuni’n ei te’n le gitlohm leh thil diklo a i gel ding uh a ginchak um a, tulai a le i hun zawm ding khâk hi thil lauh um mahmah khat ahi. Zieziekchun, (tulai a thiempu a i neih) Pathien sapchuom mite enkawl dinga Lalpa’n “belampu” (pastor leh upa) tia tunia ei guotsak hi i zahna ban ua, i zah zâwk sêmsêm ding hi i kideihsak mahmah ahi. Dan leh, Jeroboam sukkhelhna hi ei te’n le i sukkhelh ding hi I kideihsaklo ahi. Kuote ahîm in ana gen bang un, “akiman cheng in zâwng tihlo ding” tih hi ana dik mahmah ahi. Pathien i zahnau leh i lauhnau hi zie hin amuhtheih theih ahi; Ginna leh nasep akitawn ding tih Jakob in ei sinsak bang in, tunia Pathien i zahnau hi, A nasemtute chung a i thilhîh dan leh a semtute’n le bang tia i sep ahim tih ahin alang sek ahi kitileh dikthei ngîi in a.

Dan a leng Jeroboam in Pathien thiemgau matding thu a piek zieka thiltung haw kha ngaihsak dieklo in, a umdan diklo ahaihsan puoi tih hi i mu kit zel ahi.

(v.33. “Zie thil haw nung chun le Jeroboam chun a umdan diklote chu a haihsan nuom diek puoh a, vantâng laka mi, thiempu dingin a siem zel a, kuole a nuom phawt a kawihchuom a, amah le munsang thiempute lak ah a va pang a.”

Zie thil ahih ziek chun bang ahung ti tâm? Amaha ding in ‘gitlohnă’ ahung hi a, amah leh a inkuonte chu satthâk leh amanthaina ding un ahung pang tai tih i mu ahi (v.34). Zie chu ahih chun, thiempu nă ahim, ahihloh leh anasep ahim haw a ei kisaklah ahim ahihlohleh sawiselna a thil i bawl a ahih chun, ei te a ding a hi thil lauh-um leh Pathien hâwt zâwng ahî tih hi i het apawimawh ahi. Zie chu akichel zawk sémna ding in, Bethel mah a thiltung khat vak enkhawm kit hitiu.

2 Lengte 2:23-24. <sup>23</sup> Chun, Elisha chun Jerikoh chu a pawtsan a, Bethel ah a va chieh to a; lampi a a chieh lai chun, khuo apat pasal naupangte a hung pawt u a, a kawmah, “Nang lukawlhpā, pawt dawkin, nang lukawlhpā, pawt dawkin,” a tiu a. <sup>24</sup> Chun, Elisha chu a vak kinunghei a, amau haw chu a en a, Lalpa min in hansie a buokkhum ta a. Tichun, gammâng apat in

savawmnu nih a hung pawt u a, a lak u a naupang sawmli leh nih chu a hung petlum tai.

Naupang te chung a thiltung hi, naupang ngawl leh khuo helo ahiu tihna umlo hiel in, a chung ua thil tizat-um tak atun zieng dan hi i et leh, Lalpa suokte i na sawisel khâk ding hi thil lauh-um leh diklo ahih zie ei muhsak ahi.

Abân ah, thiempute (pastor, upa) ding a thil lauh-um mahmah khat aum kit zel a, zie chu Lalpa mite'n i hetpih apawimawh zel hi. Jakob 3:1 nă'n tihin agen a, “Sinsakpa chun vahawmna nasazaw sem tuok ding,” ziezekchun amau haw ding hin thihna tuk a sep leh bawl khak theih tampi ana umzel hi (genloh ding genkhâk, seploh ding sephâk). Juda gam a kipat Pathien mi ngêi khanle ana tuok ahi kha. Lengpa sukdam a aum ziek khan Pathien mi chu kipahman piek a guo a, mahleh Lalpa a kipat thu a muh guol in bangmah la lo leh ne a dawn lo in a vaikit hi tih i mu ahi (v.7-10). Zie tieng khan chu a bawlpha a, Pathien mi pûkna ding hile ana tam hiding ahi a, Bethel a thil tungte haw chu thiengau teksepu khat in ana zak na a kipat in, asietna ding a ngaihtuoh hi tih i mukit ahi. Thiengau teksepu chun

Pathien mi chu lepchieh in ana thém a, changthâk leh tûi a ne'n a dawn ta ahi (Lalpa thupiek zawp zo talo). Lalpa'n bawlloh ding a tihte abawl ziekin, ama'n le Lalpa a kipat gawtna chu ana mu ta ahi (v.18-22). Changthâk leh tûi anek leh dawn zawh in, sabiltung tawh a vahkitna a lampi kal a chun sakeibaknei in ana that ta ahi. Chang 26 na kha i etleh, Pathien mi Lalpa thugen a zuihlöö ziek in a thihiawh ahi tih i mu ahi. Zieziekchun, tunia Lalpa thupiek i zawp leh i zuihl dik ding hi Pathien mite mawhpukna lientak chu ahi (adiek in Lalpa belampute). Khutilochun, "Bil in vang zau in na tin uh, a ngaihna chu vang he puon lau; Muh vang muu in na tin uh, het vang chuh he hiel puon lau" (Matt.13:14) atihte lak ahin kitel khañtin, i hetnau leh i thuzak leh hetteu hin thihiina ei tut thei ahi. Pathien mite mawhpukna hi alien a, sukkhelh ding khak hi alauh-um mahmah a, i mi sinsakte sâng a, sinsakte sukkhelhna zieka a chung ua Lalpa vahawmna hi alauh-um ahi.

Lalpa mite leh semtute hin mawhpukna i nei gel gel ahi. Sêmdik thei sêmkhieh thei i hihna a, kitawsawt tuoh leh kitilkhuoh tuoh hi i bawn ua i hatnau hung hiding ahi. Sukhiel thei zing i hi a,

sukhiel dinga thepna a chu i puklohma ding un, Lalpa aw ngaitha kawm a, i zakte Lalpa mite kawm a chingthei tak a i gending ahi. Lalpa mite'n le Juda gam apat Pathien mi Pathien thuchah hun puo pa thiltuok hi tuoksak thei i hi tih hezing pum a, thiengau teksepu a i panloh ding hi i kideihsak ahi.

Leng Jeroboam sukhhelhna zieka a insung satthak leh sukmangthai ahinhau hekawm in Pathien mite thilbawlti i zah ding a deih-um mahmah ahi. Chun, leng Rehoboam in upate haw thumawp a laknawploh zieka a gam leh a mite a chânnna ahin, ei te'n le i lawiupate leh i upate dawt ding leh a thumawpnau i lakding hi i kideihsak ahi.

Ken ka zawh thilte gen ka hi puo a, i bawl ding dawl uh, Lalpa Thu a kipat i muhte akipat kisinsak zaw i hi. Deihsak tâkluotna zieka genkhiel genval a um chun, Lalpa min in na ngaihdamnau ka hun ngen ahi.

Lalpa lam a i hatzawk semna ding un leh i umna chiet ua i sepdik theih ngîi na ding un, Lalpa'n a thu i chanchiet ua ding in ei malsawm sak chiet tau hen

# KRISTA HUNGKITNA DING

(Matthai 24:38-39)

-Upa Khaipi

**N**oah damlai mah bang in mihiem chapa hungkitna ding chu hin a, a tih mahbang in. Tuilai khawvel kihei dan leh gingtute hinkhuo vak en hitiu. Hosea 11:1-2 “Pathien in Israel hi a naupan lai a kipat in ka lungsiet a Aigupta a kipat in ka chapa dingin ka puidawk a,” a tih bang in. Khawvel kihei dan chanchin haw hin Pathien gam anai huoi huoi in alang. Mahleh, gingtute hinkhuo ahin Pathien lauhna, ngaihkhawknna atawm huoi huoi a, I nek I dawn hawu leh I chieh nawpnau, I gennawp hawu hin Pathien mel alieh deuh deuh in, Pathien ngaihsakna atawm huoi huoi in, damsung khawsak ngaihtuohna leh nitin hinkhuo hi buoina ngen in a dim zo tai.

Leichung ahin Pathien in thil khat ahih ding tieng leh gen masa lo in ahih ngei puoi. Tuhin le Krista hung ni tieng a I suohchak theihna ding un lam chuom chuom ah thu a gen. Heb. 1:1-2 – Aleh Lalpa ni chu hungtung taleh, Noah damlai a thil tung kha bang abang die? Lalpa ni chula hungtung tei ding ahi ngal in, zie hi ngaihtuoh fel ding, thil dang cheng sanga pawimawh leh khawk chu ahi. Matthai 12:37 – Na thu a thiem chang ding, na thu mah a mawh chang ding na hi. Mahleh thiem I chan theihna dingin Pathien in a chapa achun thu a gen ta ahi. I khawvel uh a

hawih takloh ziekin, chingthei hitiu. Mun chuom chuom ah kiel hung um intin, gam khat leh gam khat hung kinawh tuoh intin. Zie thawmgi leh buoina ziekin mihiemte ngaihtuohna hung beidawng intin, thawmhauhnna nasatak hungtung in a. Khawvel hi lungkhamna leh mauna'n hung dim in a. Zie tieng chuleh lungsietna a tawm mai hilo in, mahni kilungsietnate hung bei ta'n a. Lungsietsna hun kha ana chiehmang daih hita'n a. Luhluh taka pasal kisakna leh Pathien ngaihsak lohna haw kha hung kilang intin, zie gam a chun lungmuonna hawl mahleu mu zo ta puo'n au. Pathien neilote

dingin khawvel ahin kinepna ding him him um ta puo'n a, buoina ngen a adim tak ding ziekin. Zie hun ding hi Pathien in ana gen masa ahi ta kha la. Tu hi hun buoi-um guolin lang mahleh unau ngaihtuoh pha tie! Tu hi hun kipak um, tu hi hukdamna ni chu ahi, I Bible in a tih hi guntak in I hinna ding in ngaihtuoh phai tiu.

Coronavirus in khawvel pumpi a suktawih dan leh a thu zawh dan hi a mak ka sai, gambung chuom chuom a umte'n mahni gam chiet ahun zawt tak mai uh hi. Bang thil tung ding ahi ta die? Ngaihtuoh kham, buoipih tak in alang tai. Krista hungkit masanga thil tung ding haw hi hungtung taleh, mihiemte um ding dan haw hi gen theih le hi puo'n a. Coronavirus in bawn khawvel zie tienga hi a chawhbuoi chun, Lalpa ni hungtung taleh khawvel hi bang abang die? Damsung khawsak ngaihtuohna, In pha, mun det ti'n hawl mahleu sumlepai, In pha, mun det in panpih theihna nei ta puo'n a. Atawpna chu lau leh kiling kawm kawm a thihna hi tho tho ding ahi. Zieziekchun, unau, zie buoina leh haksatna a humbit a I um theihna

ding un, Pathien in a chapa a kumsawt ngaihdamna ei siemsak hi ngaihtuohphai tiu. Krista chauh ahi ie hukdam thei leh kumsawt gam ei tun thei. Krista'an ngaina takin ahun sam in, ahun ngak in, ahun lungsiet hi, unau Krista'an nang ahun lungsiet hi.

Thuphuon 3:20-22. Awle unau zie khawvel utchakna haw cheng cheng taihsan in, Krista hun bel mai ta'n, nanga dinga tu hi hun nunungpen ahi ta mawh die. Kisik in Lalpa Lalpa ti'n sam meng in. Zieziekchun, sapna aw-gi hai pai ta'n tin, chitin pautin a mite'n a na a sep uh Krista bel tau intin, zie tieng chuleh kuo na bel ta die? Chiehna na neihna chenga na hetngilh theihloh leh na guolpha pen, chep leh muom, zu leh sa, khamtheih chi chuom chuom na ngaih mah mah haw kha, zie mun achun panna bei hung hi ta'n a. Lalpa deihbang hihte chauh ahi kumsawt gam luoh ding chuh. Na hun chiehsa haw leh tu a na umdan haw hi ngaihtuoh in, na lung a muong tak tak na? Kingaihtuoh meng in, hun in kuomah a ngak puoi. Dan leh na tih chun kinem khiel kha'n

la, tulai mihiemte dinmun hi alien aneu kinawhna ngena khawvel hi dim ahih tak ziekin, Noah a damlai guola kha phulo halo a atun loh a, zie khawvel tuipi kinawk apat I suohchak theihna dingun, nang ipmu hak inla, mithi lak apat tho in, ti chun Krista'an hun salhvak in a – Eph. 5:14. Zieziekchun, ngawl kiu inla, Lalpa deihlam bang ahi tih

ngaihtuoh chiet hitiu, kiding zinga puontum chenga dindet hun ahih tak ziekin, khawvel thil ngaihtuohna haw cheng cheng taihsan in, I hun um nalai haw cheng cheng ahih, Hin hi Krista ahi, ti thei chiet dingin Noah bang in tupna dettak nei in Krista a dingin ding det chiet hitiu. Lalpa ni chula hungtung ngei ding ahi. Na kingaihtuoh in.



## HEHPIHNA THUCHAH

- Rev Dr Ellien Gangte

**B**ible in a tuppi pen Hehpihna thu hi genthiem a, genchiet haksa tampi aum sek hi. Pasal leh numei 'Nupa'n' kihehpihna chauh haw hilo ahi. Bible in hehpihna ei sinsak hi mi dangte a dinga kipumpiekna ahi. Zie chuh eimah utdan a kingak loh a, mi dangte phatna dinga thupukna hangsan taka siem a, panpih ngamma ahi. Isu Krista'an le in ei uh dinga A hinna A piek hih, Pathien hehpihna tawplo suklatna ahi.

**Hehpihna:** Hehpihna'an a dawhthei a, zah a ngai sek hi; hehpihna'an a mitthîp puoh a; hehpihna a kipakcha puoh a, a uong puoh a: a tawi lamzang lo kha puoh a, amah angsung a khuol puoh a, a lungna vak puoh a, gitloh lam thilte a ngaihtuoh puoh a: 1Korinth

13:4-5. Zie hehpihna hih phatak a I neih a, I zuih uchun lung awihna chu hun nei a, kipak ding I hiu hi. Mihiem in a guol sika a hinna a piek khela hehpihna nasa zaw kuom'a'n a nei puoi. Johan 15:13. Hehpihna chun mi dangte phatchuomna ding ahih phawt

leh a hinna le a pie ngam hi.

**Hehpihna ziekin:** Tichun Pathien in Amah melpu'n mihiem A siem a, Pathien lim bang ngéi in ahi a siem chuh. Amau chuh numei leh pasal in a siem hi. Chun, Pathien in amau chuh A vangsa a: Pathien mah in a kawm u ah, "Chi tamtak sep a hung pung in, lei hi luoh dim un la, na thu thuu in um sak un: tuisuohgiet a nga chung haw leh, chung leng vacha chung leh, thilhing leia bawkvak chengcheng te chung achun le thu nei un," A ti a. Thilsiembul 1:27-28. "Thutiem Thak ka hun piek na hiu hi, kihehpih unla; ken nanguh ka hun hehpih guol hin, nang haw le kihehpih tuoh chiet un. Johan 13:34. Hehpihna ziekin Pathien in mihingte eina ngaidam ahi. Mihingte'n Lalpa chu limbawl a, zahtak kawma kampau I neih dinguh ahi. Hehpihna neih ziekin micheng chengin ei mawk hehpih dieklo ahi. Pathien in mihingte A hehpih banga ei unle mi dangte I hehpih dinguh ahi. Mihiemte pau leh, vânsâwlchâkte pau in thu gen thei mah lengle, hehpihna ka neih loh chun, dâk gi maimai ahim, dakkhutbet

gi maimai ahim na hing ka. Chun, thugen theihna nei in, thuguk chengcheng leh, hetna tin cheng he vek mahleng le tâng chawn theihna kham hiel taksanna bukim nei mahleng le, hehpihna ka neih loh chun bangmah hi puo'ng ka. Ka neih chengcheng pie dawk vekin, ka sapum ngéi le kâng tum dingin kipie mahleng, hehpihna ka neih loh chun, kei dingin bangmah phachuom diek puo'n a. 1Korinth 13:1-3.

**Mudah umte Hehpihna:** Pathien in eihaw ei hehpih masak ziekin, ei unle Amah I hehpih dinguh ahi. 1Johan 4:19. Pathien hehpihna zala Thagau lam a khantohna I neih phat uleh, mi muhdah um a I gelte le hehpihna hun nei thei ding I hiu hi. "Thutiem Thak ka hun piek na hiu hi, kihehpih unla; Ken nanguh ka hun hehpih guol hin, nang haw le kihehpih tuoh chiet un. Na kihehpih u chun, mi cheng chengin Ka sinsakte na hiu hi tih, zietak achun hun he'n au," A ti a. Johan 13:34-35.

Kuoma'n, bangtik lai inle Pathien a mu kha puou hi. Himahlele, I kihehpih tuoh uh chun, Pathien eimau ah um zing intin, A hehpihna le eimau ah bukim ta'n a.

1Johan 4:12. Mi dangte hehpih chuh Krista Isu a I hihnaу zal ahi. Himahlele, na melma a gilkiel chun nek ding pie'n, a dangchâk chun dâwn ding pie'n: khutibanga na hih chun, a luzâng a mei-âm suon sak hi'n la. Rome 12:20. Pathien in ei piek lungsetna vang hin, na bawn u a kawmah ka gen ahi: Na lak u a kuomah, na kingaihlul ding val u a kingailul lo in, Pathien in mitin kawma taksanna kilawm a piek guol zelin, chil taka ngaihtuoh zaw dingin ka tih chiet na hiu hi. Rome 12:3. Mi dangte kintaka muhdah I guot phatleh eile mi dangte'n ei hun mudah thei ahinhau I hetzing dinguh ahi.

**Pathien hehpihna suklatna:** "Kuole, ka thupiek haw pawm a, zawp ta chuh, ei hehpih ahi. Kuole, ei hehpih chuh Pa'n, amah le hehpih ina; Ken le amah chuh hehpih ing ka ting, a kawmah kilak ing ka," A ti a. Johan 14:21. Pathien hehpihna ziek a, A thupiek zuih a, I zawp dinguh ahi. Aw Lalpa, namtin laka le kipahthu hun hilh ing ka: Namtin lak ah nangmah pakcha'n la sa'ng ka.

Na zahngaihna chuh van khûp hiel in a nasa ngâl a, Na thutak chun vandum haw khu a supha hiel hi. Sam 108:3-4. "Lalpa In ah chieh hitiu," Ka kawma atih lai u khan ka kipâk a. Sam 122:1. Pathien hehpihna zieka Amah ho a, I pahchak zing dinguh ahi. Chun, kuole zie mi neucha haw laka khat kawma hin ka sinsak ahih zieka tui dap khawn khat mai na pie le, tihtakzet a ka hilh na hiu hi, a kipahman u chu chan hiel puo'n au," A ti a. Matthai 10:42. Lalpa min a tui dap khawn khat mai I piek lehle zie chuh A kawm I tun phatleh kipahman eina piek ding ahi. Na nasep uleh, a min zieka hehpihna na latsak sek uh, mithienghote na zenvielnau, tu tieng a le na hih zing uh chuh hengilh dingin Pathien chuh mi diktatlo ahi puoh ngâl a. Hebrai 6:10. Mi gimtheite panpih chun Lalpa a palâk sak ahi a, a thilhîh phat chuh dinthuk kit in a. Thuchingte 19:17. Taksa leh Thagau a mi cha-gah, gimtheite panpihna lamah Pathien I hehpihnau sulang hitiu. Amen!

# LOCKDOWN REVIVAL

By:- Evan.Paukhomang Gangte  
Contact no.8730026225.

“**Hipi**” Covid-19 kitih hih Dec.31.2019 in China gam Wuhan khawpia hung kipan ahi. January 30, 2020 in Kerela ah mi thum muhdawk ahi, Manipur ah February tha bul in ina he pan ui. Tuni July 6, 2020 tiengin India chuh khawvela covid-19 hau gam thumna Russia I khel tau hi. Nikhat sunga avei tamni pen chuh July 6, 2020 ni'n 24,850 auma abawn in 6,97,413 ahi, nikhat sunga thi zah 613, abawna thi zah 19,693 ating tai, chun Churachandpur dinmun chuh abawna vei zah 143 ahi, a dam kit 89, tua mi kaihsawn thei avei nalai chuh 54 auma, a thi umlo, tu hin Manipur pumpi ah covid vei 1390 a uma, a damkit 734 ahi, mi kaihsawn thei avei nalai 656 aum nalai hi. Tichun March 21, 2020 (Sunday) zingkal dak 7:00 apat nitak dak 9:00 chan India pumpi ah Janata curfew phuon ahi. India Prime Minister Narendra Modi in Pathienni zing leh nitak kikhawp thulh

ding phet pheta curfew a phuon ziekin a tamzaw gel dan in BJP te akipan ei tau, tih ahi. Aziekchuh Krismas leh Good Friday haw suktawpa Good governance a ana phuon haw khah kuoman I hengilh puou a, chuleh “Yoga” school chenga subject khata pansak ding BJP government in aguon khah I he kiukieu ui. Aban ah March 24, 2020 apat tuni July 6, 2020 chan in Total lockdown leh curfew India pumpi ah achiehtha zing hi. Abawn in ni 104 ahi ta a, lockdown tum khat ni 14 zela I hawp chun, tu hin lockdown 7 vei na I khawhkhel tau ui. Chun March 21 apat kikawpna 69 vei thulh ahi, zie chuh Nilainitak mission kikhawp 19 vei, Pauchamguol kikhawp kiginnitak 20 vei leh Pathienni zing Sunday school leh nitak sermon kikhawp 30 vei, abawn in 69 vei ahi tai. Chun thil kipah um khat chuh piengthakte sangin piengthak lote'n kikhawp loh a puona zawu hi. Pathien chate'n

chuh chawmkhat kikhawp  
loh bangma'n I ngai puou hi.  
Aziekchuh khawvel kisiem  
tung apat sukmang a guot uh  
Kristien sakhuo hih sukmang  
theih loh, a neitu um ahi tih  
I hechien ui. Pathien chuh  
Lockdown bangzah um lele  
chau ngei lo, chawl ngei lo  
ahia, himahleh thachau leh  
sawlsamte kawma thathak  
pie ding leh, hatna himhim  
neilote kawma hatna pie  
dinga kimansa ahi (**Isa.40:28-31**). Manipur ah July 1-15  
chan lockdown behlap ahi  
kita, India mun khenkhat ah  
July 30 chan suksaubeh ahi.  
June 1-30 chan hih unlock 1  
akitia, chuleh July 1-31 chan  
hih unlock 2 akiti kit hi. A  
rule dungzui takin Unlock 1  
apatin social distancing kawm  
in sakhuo lam kikhawpna  
leh Pathien hona haw leh,  
hotels, restaurants, hospital  
hawn theih ahia, chun, van  
kizuokna, shoping malls  
khenkhat le hawn phalsak ahi  
tai. Himahleh social distancing  
kawma kikhawp ding buoi  
huoi ahi a, distancing ding  
hileh Bench khata mi bangzah  
chu ding, kithak thawh ding  
hileh kuo kuo kikhawm masa  
ding, thil buoi umtak ahi. Mi

kimkhat in bazar ah social  
distancing I bawl diek puou  
in kikhawpna ah distancing  
I gen un kikhawploh lamah  
I kithutuok ten ui, ti'n  
a gen sek ui. Himahleh,  
America gam Louisiana Life  
Tabernacle church Pastor  
Tony Spell in paramedics leh  
law enforcement-te sangin  
thagau thiengtho ahat zawi,  
ka memberte covid a vei leh  
khutnga'n pauchamsak ka  
ting, ei humbit dingin Pathien  
ka muong ui, ti'n, lockdown  
zah lo in Bus dimdim in a  
memberte a kikhawppih hi.  
Chun a memberte lak ah  
positive mi 1400 ahung um  
a, mi 46 a thi ngal ui. Tuhin  
America gama covid hau laka  
simtel ahi tau hi. Zieziekchun  
Lockdown in Biekin kawtkhak  
mahleh lunggil kawt akhak  
thei puoi. LALPA'N na  
lunggila thu a kawih leh a ngai  
ding hawl lo in gen inla, la  
ahun piek leh khuong hawlse  
lo in--- Aw Halleluja LALPA  
lopi pen, a pakna la'n gamtin  
thawng hen, ti'n namtin lal lopi  
leh zah umpen chun I lunggil  
sunga thu hun gen kit hen,  
ti'n thawng jejun sa zieng leh  
chun ak aum leh ak piengthak  
intin, ui aum leh ui pieng thak

naven ti! Zieziekchun Revival tung thei zing ahi tih gingcha lah puoi tiu.

**1. ONLINE SERMON:** Online sermon kiti chuh Smart phone manga Pathien thu hawih taktak kigen I vak ngaih zieng theih hawu genna ahi. Lockdown sungin thingtang lam achun kikhawpna um thei tho mahleh phailam ah 69 vei kikikhawmta lo ahi. Himahleh mi kipie zote'n kuol muna ngaih theih dingkhawp in sum leh pai sengin sermon hawih taktak ahun siem ua, amau haw ziekin kipahthu I gen ui. Adiek in ei lak ah- (1) Rev. Dr.Kh.Khaizakham sermonte 'In lam chephat ahitai' leh 'Pathen gaosapna vannoi leh Jerusalem thah' chuleh Mothers Day sermonte leh adangdang. Chun, (2) Evan. T. Damkhothang @ Thangpu leh a sermonte- Tawl damna pathian; Thupukna nang bawl ahi; chuleh Hinna leh sihna thu tawite leh adangdang. (3) Evan.Lalthantluanga @ Tluangtea leh a sermonte "Thlarau ah awm rawh u, Hri pui lauhawm lak ah ahum ang, chun Engtikmah in tlu lo vang, leh adangdang haw,

Sappau tihloh ei thingtangpa pau ngei in tamtak aum tai. Lockdown sunga Pathien thu ngaihna ding mawngmawnga smart phone chaw le ki-um ahi.

**2. ONLINE PRAYER MEETING:** Online prayer meeting kiti chuh Biekina chiehkhawm hilo a, I phone chiet manga pauchamna neihkhawm genna ahi. Mipi pauchamguolna um talo ahih ziekin March 24, 2020 (Nilaini) in Time Square Church, New York ah gam 200 hiel apatin online prayer meeting a nei ui. Zie hun chuh Lou Eagle Ministries group-te'n a makaih ua, Covid-19 chunga zawhna a ngen khawm ua, zietaka chun mi asanga sim a pang ui. Chuleh Artist Justin Bieber nasan in a instragam ah a nungzuite Pathien buon dingin a chiela, amau pawl chuh Bethel worship Leader Sean Feucht in ni chengin pauchamna a lamkaih sek hi. Pathien lopina chang hen.

Chuleh Pastor-te ding bik '**Online Global Prayer**' chuh Purpose Driven Life zikpa leh Sadleback Church Pastor Rick Waren leh azi Kay malakna'n

Sunday service um talo ahih ziekin, April 6, 2020 Easter Sunday ni'n, ***Global Easter Pastor Prayer Gathering*** a neihpih a, khawvel pumpi apat sapchuom lamkai leh Pastorte tampi a tel ua, Pathien ngai taktaka sam a hiu a, Lockdown akichaih zieng loh chun revival hungtung puon a tih zieng ngam hi puo'n a.

Chuleh Lockdown ziek mahin Evan. Matt Brown, Think E. Ministries inle Social Media Prayer Meeting a guonggallah a, tu hih paucham hun ahi, ti'n mi tampi'n ana joint ui.

**3. VIRTUAL CELL PHONE CHOIRS:** Zie choir group hih I gensa bangin Lockdown zieka kikhawp lasak aum takloh nunga hung um ahia; munkhata la vazil khawm hilo in, I umna mun chieta cell phone manga zila, sakhwam pawl ahi kit ui. A lapi'u chuh "Aphai ka thagau din," tih khah ahi. Zie la hih American Lawyer, mihausa chuleh sapchuom Upa Pathien mi, Evan. D.L. Moody crusade sponsored ana bawl sek, Horatio Spafford phuok ahi. A la I sakmau in In sung vangsietna nia kiphuok ahih

hi vak he masai tiu. 1873 kum in H.Spafford chuh azi Anna chuleh a chanute li tawh Chicago ava zin ui. Chicago khawpi meikakna lakah amah sumsinna inle akak khawm ziekin, DL.Moody crusade Europe gama sim dinga azi leh achanu lite a sawl masak chungin a chutnau British lawng Lockhearn lawng dang tawh akiphut tuoh ziekin a chanute tui ah a tum tau a, a zi'n telegraph ah "**kei chauh suokcha, ngaihtak na hung tieng tupi chungah lawng in hung ki'n**," ti'n thu a thak hi. Lenna'n chieh zo ten ding ahi, hinla a chanute thihna mu ut in Lawng ah a hunga, a chate thihna mun ahun phak in, Covid hun laitaka le sak theih LALPA'N la khat a pie a; ***Tun chuh kei a di'n hin Krista hita hen, Jordan tuipi kinawng mahleh; Thihna leh hinna ale khawksapuo'ngka, Ka thagau na lungmuon ding ziekin; Aphai, aphai ka thagau dingin***, tih hi ahi. Covid zieka leisiet chung abuoi lai tako ***aphai aphai ka tha gau di'n*** tia, la sa ding chuh ei uh I hiu hi. A chanchin kim zaw chuh Evan. Lienthuom Lehkhabu "**Laphuokte chanchin**" ah ana

sim mai hitiu. Zie hih Nashvile Studio Singer Community member 31 in asiem uh ahia, David Wise in produce a bawla, youtube leh Facebook ah mitthi dawk hiela ngaih theih in aum tai. Zie haw hih lockdown zieka I masawnna hawu chuh ahi.

**4. DRIVE IN SERVICE:** Chun, social distancing puma kikhawp chuh thil haksapi ahia, ni danga Ho-In dima kikhawmte bench khata mi bangzah chu ta, kuo kuo kikhawm phawt ding tia hawptuok zel ding chuh thil haksapi ahih ziek, America gama Sothern Baptist Church te'n lokdown ziek mah in "**Drive in service**" ahun pan ui. Amau car chieta chieh in, Ho-In compound ah kuomah kumlo in, FM Radio music ahun thah ua, tichun church Pastor in Pathien thu a gena a lhim mahmah ui. Zie tawbang kikhawpna hih Great Bridge Baptist Pastor Langford in ava muh takin amau sapchuom le a patpih a, phatakin zie service hih Pastor in latna a nei a, tichun amau gari chiet mangin church compound ah social distancing buoipih ngai talo in, thawveng takin

a bawl ua, tichun abanban in Cornerstone Baptist Church, Harrisburg te'n le abawl ua, Chun Arkansas Baptist Church ah nupa tuok khat leh mi gup a piengthak ui. Chuleh ziehaw mai lo hile gen ding atam hi. Nashvile, Tennesia covid-19 Hospital ah Doctor leh Nurse te'n hun awng aneih phawt uleh In sawng chungah covid damlo leh a inkuonte dingin pauchamna ava neih sak ua, hun kibichilh tako Pathien va sap chuh thatnawp aum dan a gen ui. Nangin lockdown sung bangti'n na mang em? Achângleh USA gama Sapchuomte'n amau gari chietin Hospital umkuol in covid Doctor leh Nurse te dingin pauchamna ava neih sak sek ui a tiu hi. Lockdown ziek Pathien nasep a chawl mai loh dan I vak gen uh ahi. Zie hun sunga testimony leh sapchuom chieh zel dan report bawl nuom I um um? Banghim tia, zik man lo I hih lele achunga phone No. kipie ahin hun hetsak leu chun hun taklat zel theih ahi.

Awle thu tawmchah ka vak behlap nuom chuh ahih leh, ni danga I Pathien ho dan uh enthak kit leuhing nawp

aum hi. Bang zieka kikhawp subuoi hamham dinga khawvel pumpi sukbuoi aum ahim? Nidang laia Aigupta a thil tung Tui thisan suok, hik leh ukeng haw khah milim Pathien hote subuoi khelkhel dinga thil kibawl ahi tih na gel kha'm? Etsakna dingin Nile luipi chuh Aigupta lobawlte kingakna ahih ziek in Pathien guol in a ho ua, tui thisan ahung suok khan a ho thei ta puou hi, chuleh Ukeng hih chi phatna leh numei nauneih baihlamna ahi a tih ziek un aho ua, gam pumpi Ukeng ngawna adim zieng khan, ho dingin le a gel ta puou khah, zie guol chun bang dinga kikhawp um taklohma gama sala puiha um I hiu em? Bang ziek pena Biek-In a Keyboard leh music instrument haw ap zo ahi tam? Na music teu, na thil-lat-teu, na kikhawpna hawu ah ka tel ut puoi, diktatna himhim nei lote, ti'n Pathien in a gen hi. Ngaina sam lo a la I sakteu, lungsietna tel loa thawhlawm I piek sekteu leh ipmu ding maia Ho-In a I va chut hawu khah achimchak ta hoh ahi dem? (**Amos.5:21-24**). Khawigam ale sakhuo lam hotu LCC leh workerte,

Pathien nasem Pastor, Upa leh sawlchakte la mipi tawh akibatlohnau muh ding umlo, mipite'n utdan dana kaih theih dinga um, thudik leh ginum taka mi puih guo umlo (**Mal.3:18**); I kikhawp unle Pathien ngaihnatna um lo, na kithawihna teu, na thil hun tuokteu leh, ka masanga na hung kilak u hile ka chim zawkzawk hi, ka Ho-In hung tawh ta kiu, amai maia kih hih ka chimitai tih hi LALPA kamsuok ahi (**Isa.1:11-14**). Israel-te chuh, Pathien in apulehpateu kawma piek atiem Kanaan gama ahung chén tungun, Pathien vangsakna chitin tawh nuomsa takin ahung khuosau a, buh leh bal sum leh pai kiningtaka ahung khawsak phetun, Sabath lah nit peih lo, sawmakhat lah pie ngam ta lo, zieziekchun Sabath umlohma gam Babulon ah suok chang dingin a tawlmanga sal tan kum, kum 70 khah tawm a sa hiel puou hi. Akah u lele Jeruasalem lam nga'n a kap ua, a paucham u lele Jerusalem lam nga'n a paucham ua, nang ka hun hetzing loh a, ka lawpna pen sanga Jerusalem ka deih zawk loh a, ka hetngilh

kit ngeingei leh ka lei hi ka khadang ah bek mai hen, a tih hiel phet un Lalpa'n sabath leh sawmakhat piekna gam ah a pui kit hi (*Ps.137:1-6*). Tuhin le lockdown masanga I kikhawpnau haw khah

Pathien pawmtak ahi tak tak na die? Pathien in kihawpna hun ei hun pie kit leh bangti'n I kikhawm ding um, ei mau chiet kingaihtuoh hitiu. LALPA'N a thu malswm ta hen.



*Khawvel thuthang:*

## INDIA-CHINA GAMGI A BUOINA

**I**ndia leh China gamgi Galwan Valley, Eastern Ladakh ah kum 50 sunga kinakna huoisie pen a tiemteh June 15, 2020 (Monday) zan khan India sepaih 20, Lt. Colonel khat tel in, China sepaih (People of Liberation Army) te'n a that ui or a khenlum ui. Atung pena Army te gendan chun Officer khat leh sepaih nih a thii, ti'n agen ui. Ahih ziekin Thawhlehni nitak lam in a thi chu 20 ahi a, sepaih 17 chuh nasataka liem in, a dap takluot ziekin a duty na mun ua chun a thi'u hi, ti'n ahun report kit ui.

Government thuphuongtu'n le, "China sepaihte'n le a thuok zawhloh tieng un liemna a tuok ui. Ahi'n, azah chuh a sulang nuom puou hi. ANI News chun vang China sepaih atawmpen in 43 huoisie takaliem leh thihna tuok le um in gen hi. Kum 1967 a Nathula muna gamnih kala buoin tunga India sepaih 80 vel leh China sepaih 300 vel ana thih nung u a gamji zula buoin-kinakna huoisie pen ahi.

Alangtuok in a thi leh liemte chuh amau gam lam gel u, munthip ah a kipuoklut u a, Government chula Covid-19 a buoi, ni chenga natna vei pung zel a etzui uh a ngai zel hi.

### Galwan muna a buoi hun uh:

1. June 6, 2020: India leh China gamgi thu a buoina sawttaka ana um sukbeihna dingin Lt. General level a kihona, June 6 in a nei ui.

2. Zie hapta lailung vel chun, China sepaihte ahung u a, India gamsung ah Camp ahung siem u a, zie Camp chuh India Army te'n a suksietsak uleh buoina ahung kipan a, alangtuok in liemna leh thihna a tuok ui.
3. June 14: China sepaihte chuh a kinung zuk u a, a gamsung u ah a lut kit u a, ahiih ziekin, Pathienni khan a tamzaw dieka hunglut u a, suong in le a kisep tuoh ui.
4. June 15: Thawhtanni nitak in Galwan luipi tang chung kenlak achun a kiphengsuol u a, a kibawtuhouh tau hi. Buoina chuh kintak in ahung khawksie a, India sepaikh tamtak chuh Galwan lui achun a kiliklut ui, ti'n thuphuongtu chun a gen hi.
- June 6, ni a kihona achun China sepaihte chuh kinungzuk a, maban sawnlo dinga kihochamna nei in, June 16 a Major General level a kihona um dingin phasakna a nei gel ui.
5. China Army (PLA) chuh a kinungzuk nuom takloh phet un, India sepaikh meithal chawilo, Colonel Santosh Babu, 16 Bihar Regiment makaih in China sepaihte umna lam achun kiho dingin a chieh tau hi. China sepaihte a kinungtawl nuom loh phet u chun, a dinmun chuh ahung sosang tai. Tichun, China sepaihte chun thingtum-suontum, thingtawna thikkilh kikhen chal zieng, thik ling dai haw mawlh a zem in, India sepaihte chuh a kibawh huon zieng tau hi. Ziephetchun, India sepaihte chun le theihtawpa pan la'n a kisuol tau hi. Hiem leh thal manglo gel ahiih ziekuh aliem tamzaw chuh suonga a tah uh, a seh uh, thiktawna kizep in a kigen hi.
6. India sepaikh hotu OC a khet khak u chun, nasatak in a liem a, sepaihte chun OC leh Havildar liemna tuokte chuh a pawdawk u a, sepaikh liem tamtak, China te'n a mat hawu chuh a nusieh tau hi.
7. Zie zagh minute 40 vel chun Major khat makaih in zie mun achun ava chieh kit uleh amun a tun tun u chun thil umdan chuh a khawksie zaw sem tai.
8. India sepaihte chun China te post haw chuh thagum in a susieu a, China sepaihte chuh 55-56 vel chun huoisie takin a liem ui. Zie mun ahin tampi

liem leh thihna tung in a gen ui. China lam inle thihiph theih tienga liemna a tuok u a, azah chientaka hetna vang a um puoi.

Zie thil tunna mun hi tangsip chung, apangtuok ken lak ahii ziekin sepaikh tamtak chuh kenlak (kawl) a sawtthak ahia a, Galwan lui a kiliklut in a gen ui. India sepaikte hi China sepaikh sangin a tam zawu hi ti'n China source chun agen hi.

Zie mun achun China Officer Brigadier level chun a post u apat chun sepaikte chuh kinalo dinga thoh in a khut a zak hi tih muhtheih ahi.

9. Thaguma kinawhtuoh:  
Zankhang chan in kinakna a

um a, suongtum, thiktawn, thiklingnei hawa hahmat ziekun luchang lam a hahliem diek hi.

10. T h a g u m a  
kinawhtuohna hih dakkal  
thum val ahi.

11. Akinak uhi zankhang nungin a haithei chauh ui. Sepaikh luong tampi luipi apat a luoidawk u a, a liem tamtak chu liem thuok zolo in, zingkal in a thi'u hi. Zie hun hin Colonel to Colonel level a kihona tamtak vei a nei ui. Tuhin, Indo-Tibetan Border Police Post (ITBP) chuh Army khuta kawih ahi tai.

India Today  
June 18, 2020

## Ngetna

*Chamna aw hi subscribe a, Articles a hun pie zing ding in leh subscriber ding hun hawla sponsor hun bawl zel ding in, chun aphung vukna ale pang dingin na tawmgaihnau leh deihsaknau Pathien min in ka hun ngen ui.*

- Editorial Board

# THUTAK BANG AHI?

-Evan. Lamzagin

**C**hangtel: John 18:37-38. Chun, Pilate in a kawmah, “A leh, leng hilo na hi?” a ti a. Isu’n, “Hi e, leng ka hi a puo! Thutak hetsak hi ka pien lawh leh, khawvel a ka hung lawh ahi. Kuole, thutaka um ta poh in ka thu a pawm sek ui,” a ti a. Pilate in a kawmah, “Thutak chuh bang ahi?” a ti a.

Bible ahin thutak tih hi thil bang hi taleh kingakna ngam leh ginchak ngam genna a mat ahi sek hi. Thutak chu a det a, adanglam kha puoi. Zie hin Grik te ngaihdan a kallh hi, Grik te chun, thutak chu ngaihtuohna leh ngaihtuohna bulpi, khawvel lui leh sie ta apata um chuom ahi a tiu. Bible in thutak a gen/a tih hi chu, Pathien in khawvel leh mihiem a siemte a dinga a thilguot danglam ngeilo kingakna chu ahi. Khutichun, Pathien thutak dawn/laksawn dan diktak chu, Pathien thu tiem ginchaka kingak mai hi ahi. Mihing chanchin ah, Pathien leh mihingte kikala, adiek tak in, kitimat/kipumkhatna bul chu ginna/kingakna hi ahi. Abraham chun, Pathien thutiem a gingcha a (Thilsiembul 15:6) na sim in.

Jakob chun, thu a awihloh chunga le, a chunga Pathien in a hehpih leh a ginumna a latsak/a suklat zel ziekin Pathien kawm ah kipakthu a gen hi (Thilsiembul 32:9-12) na sim in. Mosi hinle, mi chithah sawn zelte chung ah Pathien in a hehpihna a suklat zel ziekin Sinai tang akhan Pathien a pakchai (Pawtdawkna 34:6-7) sim in. Pathien chuh bang tik hun inle, a ginum a, a thutiem leh a lemgoutnate chu adik in kingakna tak ahi (Dannihna 32:3-4) sim hitiu. Thaichi haw akhan zel bang leh ni leh aksi haw a vak zing bang hin, Pathien hehpihna leh a thutiem chu kum khawsawt kum khawsawt a kingakna ngam ahi. (Sam 85:10-11). Zahngaihna leh thutaka kituokkhawm untin, dikna leh chamna kichawptuoh un au. Thutak chuh lei apat in

luongdawk intin, diktatna chun Van apat in hun ensuk in a.

Thuthun thak achun, Thagau Thiengtho in Isu chuh, nasem dingin a guot a, amah guota a umna hi Isai in ana genlawk hi atak a ahung tunna hi ahi (Luk 4:18-19). “Liengvaite kawma Chanchin Pha gen dinga nei guot ziekin, Lalpa Thagau chuh ka chungah a um; Amah chun salte kawma pawtna thu leh, Mitdûkte kawma mit vak neih kitna thu gen ding leh, Sukgimtheih thuokte pawtdawk sakna ding leh, Lalpa lungkim kum thu gen ding banga ei sawl ahii,” tih hi. Isu’n a mite dinga Pathien thiltup a gen haw chuh, thudik tawntung leh ginchak tak ahih zie namdetna’n Hebrai pau in, “Amen” tih hi a mang zing sek hi.

Matt. 5:18. Tihtakzet a ka hilh na hiu hi, lei leh van a beihmang masang sieh, dân thu a sutvawm neucha ahim, thaihvawm neucha ahim hi a bawna a tunkim masang sieh khatcha hile beimang hiel puo’n a.

Chun, Isu chun, Mosi leh thiemgaute lehkha ah a pan a, Pathien lehkha thu a amah chanchin kizik chuh amau haw a hilh chien ta a (Luke 24:27). Luke 24:45. Tichun, Pathien lehkathu hethei dingin, a lungthimteu a suk-hawn sak a,<sup>46</sup> a kawm u ah, “Zie tawbanga hi zik ahii: ‘Krista chun dahum thuok intin, ni thum ni’n mithi lak apat thokit intin,<sup>47</sup> amah min in, lunghei na thu leh gitloh ngaihdamna thu, Jerusalem khuo a kipatin, namtin kawmah gen in um ina,’ ti’n.<sup>48</sup> Ziehaw thil chengcheng chuh a hetpihte na hiu hi.<sup>49</sup> Chun, ngaitiem u, Pa thil tiem chuh na chung u hun sawl ding ka hi; himahleh, chunglam apat a thilhiah theihna’n a hun thuom masang sieh chuh, khawpi ahin um zingun” a ti a.

John zik ahin, Isu chuh vak tak (1:9) Pathien thudik (4:37) hun tuntu chu ahi tih agen hi. Amah mah chuh lamdik (14:6) Thagau diktak hun sawltu (16:13) ahi. Chun, Isu chu Pathien thutak ahi (14:6) A mite chuh, Pathien puihna leh thutiem a kinga’n a hing zing ui.

Sawlchak Paul lehkhathek/ thawn haw hin, Sinsakna diklo lak ah (I Tim.1:3-4; 2 Tim.2:16-18) Thutak dodaltute lak ah (2 Tim.3:6-9) Thusim mai mai buoipihite (Tita 1:10-14) laka chingthei dinga hilhna taklat ahi. Zie lehkhathek haw hin, Sapchuom chuh ginna diktak kawltup dinga siem ding ahi (I Tim.6:11-21) Thutaka kingak chak a deih hi, zie chu ginna diktak chuh ahi. (I Tim. 3:14-15). Chawmlokal in na kawm u ah hung kinem in, zie thu haw hi na kawma ka hun zik

ahi.<sup>15</sup> Himahlele, ka hung hak khakpalh leh, Pathien inkawte laka mi chuh, bangtia um ding ahim tih, na het theihna dingin ka hun zik ahi; ziehaw chuh Pathien hing sapchuom, thutak khuom leh kingakna chuh ahiu hi.

John 4:24. Pathien chuh Thagau ahi, amah hote chun Thagau leh thutaka a ho dinguh ahi,” a ti a.

Laipa’n a thu hi thutak ahih hechien/muchien dingin vangsak ta hen.



## HIPI NATNA HI LALPA SAPNA AW DAN IN I NGAI UM?

By: Kaizomlal Gangte, M.Div.

Tuni'n nu leh pa, khanglaite zie hipi natna hi ei gam sunga a hungtung dinga le I gingchak phak loh hiel in ahung tung phut ta mai a, mak le I sa mai theih ui, ahin Lalpa vaihawm dan hi a thupi a a lopina leh a thilhihtheihna haw hi a Pathien hihna hi a sulang zel a. I Bible I muh dungzui in, Dannihna 28:59, Lalpa nang uh leh, na suonteu suonteu chungah hipi huoisie tak tak bei thei

lo lensak ina zie hin a gen dik mah mah mai a, zie khel a chang 61 I et kit leh zie dan lehkhabu a kizik kha lo natpi hipi tin cheng le na manthai masangsieh un, na chung u ah Lalpa’n lensak in a. Tuni'n Lalpa’n khawvel pumpi kibang taka a Vaihawm tieng leh micheng in a thuoklah ui maw. Ahin ei haw Churachandpur te hi bang phatna lawm lawm I nei u a, Lalpa zahngaihna I chan naklai u hi a thupi e

maw. I chennau khawpi hi gitlohma huoisie mah mah, kilungsietna um talo, mahni thu thu a zalen a, ei mah sum le pai haw suong a Lalpa hauhsakna kikhawppih sanga ei a kisuonpih, mi gimthei leh liengvaite khuotuoh um ta lo, zieziek tak taka hih Lalpa mit hi kham taluo ta, khawvel pumi gawtna huoisie tak mai I tuok lawh tau ui.

Tuni'n ei generation a zie tawbang huoisie tak gen mang mawh hiel a thusim hung

hi ta ding ahi a, zie apat hin bang lunggel na nei em, Lalpa hopihna I chang nau em, nu le pa, khanglaite haw kigel tiem u, tuni hin I thil tuokteu hi ei haw mimal chiet khanlawhna lopitak mai hung hi chiet leh deih aum hi.

**CONCLUSION:** Zie hipi natna apat bang zillai I mudawk thei um, I Bible ah en leuhing Sunna La 5:21, Aw Lalpa nang lam ei ngatsak inla, khutichun siemthak in um ing ka. Malai bang in ka niteu ei siemthak sak kit in.



## PAUCHAMNA A HETDING:

A. Gangte Holy Bible hi a copy abeihna asawt them ta a, translation work lam le la deih bangin ahat thei puo a, zie new translation hi bangtika zawh ding ahim tih hi gen haksa ahiih tak ziek in, bible neih vak theihna ding ngaithuoh ahi a, tua I bible neih pen uhi a manuscript um sa ahiih ziekin zie hi a spellinga typing mistake khenkhat suk dika print kit mai zawk ding ngaihtuoh ahi. Zie ding a hi BSI Dimapur Auxiliary te akihopih leh Covid-19 hin ahun tun bichilh kit leh amau le na sem

theilo a um in atawp in 2020 August tha velleh North East pumpi a ding a Bible thu him him gen khawm ding meeting um ding ahi a zie a chun hun gen ungtuk tih thu ei hun hilh ui. August tha tun kal ngaklah ziek le hin tin dated, 6/07/20 ni a Phone a avak kidawpkit leh hun a thawveng nai tadih puo'n November a ding in meeting ka chawn ui, ti'n ei hun hih kit u a, zie November a a meeting dingu chu I vak ngak kit phawt uh ngai zel ding dan in a um hi.

Tulai khawvel huihnun dan I het uh ginchak a um a, kuomah hi adeih bang uh a na sem zung zung tih um thei zieng ta lo ahiu a, kinawh thim leng le ahitheilo thil ana umsek a akhawk hi tih khel chu gen ding um thei seklo ahi. Bible sukna lam ahung lamzan theihna ding in I paucham nau ah hezui zêl ding in I ki ngen ui.

*Chun, Bible Society te'n November tha tienga hun ei suksau sak naklai ziek un bang ahim ti a I bible a typing mistake ana mudawk I um naklai uleh hun ei piek sung uh ahi na hun pieklut theih naklai uh ahi.*

B. Tulai gamsung pumpi a natna hi (Covid-19) leng kumbul a pata I na do pat uh ahi ta a zie natna hin eilak a le buoina adieka I sapchuom sung ah hungtung thei ding ahi, tih lunggel ana kinei in, bang ahim ti a ahaksa diek te kithuohpih theihna ding

ahih khâk leh ti'n Samchuom hileh mimal hileh sumlepai hun thawh thei aum khadem ti'n hetsakna ahun kihawm a, zie lehkha kihawpna apata dawnna kimu sun chuh New Lambulane Sapchuom a pat in Rs 870/- ahung lut a, Relief fund nei tamlo I hih nau ah ahaksa cheng le kithuohpih zolo ding ahih hezing kawm in mahni local a a haksa laka le ahaksa diekdiek te hun entha a amin hun pielut dingin local church lehkha ahun kipie kit a, hetsakna dungzui a min hung kipielut um sun te BRDP Fund neukhat a umsa tawh behlap in Anchang Bag 19 a kichaw a zie anchang chu hawpkhen theih dan dana hawm khen in panpihna piek ahiu ui. Tawbanga panpihna thupilo hilele pie thei dinga vangsakna I chan ziek un ei pie tu Pathien kawm ah kipah thu I gen ui.

Executive Director

# THAITHAK THUCHAH

By: Rev. Khaitinthang

Bible changtel: Pawtdawkna 34:26

**A** masa'n simtute cheng Lalpa Isu Krista min in chibai ka hun buk masai. I Bible I et leh Thaithak lawp tih hih kichien taka muh in aum puoi. Mahleh, zie hih, tunia gingtute, Sapchuomte'n Pathien kienga kipahthu genna leh I thil neihteu a Pathien limbawlnaa I mat un akilang zawi. Bible apata Thaithak Pathien kienga ana kawih dan uleh I Bible in ei na tupsak dan khenkhat ana en hitiu. Pawtdawkna 34:26 na ahin, "Na lo thaigah masapen chuh, kum cheng leh Lalpa In a na hun kawih ding uh tih ahi.

## I. ISRAELTE DINGA HIH MAKMAWH:-

- Dannihna 26:10. Tuhin ngaitie, aw Lalpa nangin nei piek gama lei gah masapen chiet ka hun chawi ui. Na va tih dinguh ahi. Chun, Lalpa na Pathien uh ma achun kawih in na tin uh, Lalpa na Pathien uh maa chun, amah ho in kun un.
- Thuchingte 3:9. Na thil neihteu chun Lalpa chuh limbawl inla, na gah masate cheng cheng chu tawh.
- Thiempudante 23:10. Gah masa, buhphal masapen chuh Thiempu masanga na hun chawih dinguh ahi.
- Ezekiel 20:40. Ka tang thiengtho chung achun, Israel tang sang achun, zie tak achun Israel Insung mite cheng cheng chun a bawn un, zie gam achun ka na sem ta'n au. Zie chun, amau chuh pawm ta'ng ka ting, zie chun na thillatteu, na thilpiekteu leh na thilzek cheng chengteu chuh deih ta'ng ka.

## II. TUNUNGA ISRAELTE DINGA ETSAKNA:

- Jakob 1:18. A thilsiem haw laka gah masa I hung hih theihna dingun.

- (b) I Korinth 15:20. Himahlele Krista chuh, mithi lak apat kaihthawh in aum hi tih hih thudik ahi a, mithite thawh mapui pa le ahung hi tai.
- (c) Rom 11:16. Gah masa chule athientho chun, adang cheng le thiengtho ina.
- (d) Thuphuon 14:4. Ziete haw chuh, Pathien a ding leh Belam no a dinga gah masa hidingga Lei apata tatdawkte chuh ahieu hi.
- (e) Rom 8:23. Zie mai chuh ei puoi, ei haw ngei le, Pathien thilpiek masa, thagau neite hinle, I sapum tatnau chuh ngak in, ei uh nasan le I lunghthim un, I tau uh ahi.

### **III. MIHIEMTE LAKA GAH MASA:-**

Rom 16:5. A In ua Sapchuom kikhawm haw mah kha le ei hun chibai sak un. Chuleh ka chapa deihtak, Epainetas, Asia gama Krista a gah masapen kha le ei hun chibai sak un.

Tuni a zie a Bible chang I vak suklat haw hi, Pathien in, abik taka Israelte leh tuhuna Sapchuomte Krista zala hukdam I hung hih theihna ding uleh, Krista hi thawh mapui pa leh gah masa ahiah dan asulang hi.

Zieziekchun, tuni hun a thaithak gah masa, Pathien kawma I piek uh ahin, Krista, I ding ua Pathien masanga a kipiekna a sulang diek hi. Gingtute Krista a hinna neite'n, tua Krista Pathien a gah masa ahiah guol hin, ei haw le Pathien a dinga gah masa I hiu hi.

**Note:** Sapchuomte'n I thil neihteuh leh I thaigah masa, Pathien kienga I chawiha kipahthu I gen hih, I hih ding mawng ahi. Amahvang ei a umlo mi sepawkna chunga kipahthu I gen sek hi pha mah mah napi'n, nangin bangti'n na gel em? Zie guol hin I Kristien hinkhuo hile aum khak ding hi thil khawktak hiding ahi. Zieziekchun, mitin kingaihtuoh thak chiet hitiu. Nanga bangmah um samlo a, mi neih chunga kipak mai na him?

Lalpa'n zie thu neucha apan hin eimau chiet ei hopih i, mi gah apata kipak mai lo in, ei ua pat gah um zal hin kipak zaw thei dingin Lalpa'n na bawn un hun vangsak chiet ta hen.

# NUNAK GINUM

-Rev. Khaigin Gangte

Zie thusim hi, “Pentecostal Lady” kiti September-October Issue ka simna ah ka mu a, hawih ka sa’n a thusim hi kuo cheng het dingin ka deih a, ka hun suklat ahi. Ana sim tie, a diekin tulai nungakte a dingin hawih ka sa diek hi.

New England a nungak melhawih tak khat tawh kihuolna a neih zawh uh chawmkhat zawh chun Tangvalpa chu kidona mun a chieh dinga teldawk ahi ta mai a. Zeziekchun, a kichenna ding hun u chule chawn hiel angai ta a. A tangvalpa chu kidona mun tamtak achun a suokcha sek a. Ahinla, **“Battle of Wilderness”** kiti a kidona achun liemna nasatak a tuok ta a. A zi denga a kihuolpih nu chunla bangmah het ana nei puo a, ahung suty ding ngak in ni ana sim keuh keuh zing mai a. Lehkathawn la a mu kha tapuoh a, chanchin bangmah hetna a nei talo him him ahi. Ahi, atawp chun lehkathawn a mu ta a, zie chule lehkhamal hawihlo taka kizik, a muh khakloh lehkhamal ahi nalai hi. Zie lehkathawn achun, “Kidona dang a um to zel a, a haksa to deuh deuh nalai a, kei di’n a hun gen leh hun hilh hi haksa mahleh hun genloh theih ahi ta puo a, tuhin *“Ka khut langnih ka chan ta a na lehkha ding nasan ka zik thei ta puoh a, ka guolpa khat in zie lehkha hi ei ziksak ahi, ka damsung cheng chu midangte panpihna, midangte chunga ka kingak ngai ding ahi tai. Ahinla, ka hun lungsietna hi a ngei ngei ahi a, himahleh kicheng dinga I kihuolna kha ka phel a, ka hun zalensak mai hi, pha dingin ka he mai tai, zalen tak in ana um mai ta’n,”* ti’n a thak mai tai.

Ahinla, zie lehkathawn chun zik thawh a lehthukkit ahi puo a, Rel (train) chieh masapen dinga chu chieh in kidona mun lam chu a zuon vang vang mai tai. Amun a tun pheta chu sepaih captain khat kawma chu sepaih liemna tuok khat hawl ahih dan a hilh leh captain pa chunle a lungsiet mah mah. A umna munlam kichien taka a kawkmuh zawh chun nungaknu chu mittui va keuh keuh pum chun sepaih liemna lam chu a tung tai. A dawngmapa, sepaih liem kuol chu a muh muh in a kun a, a khut in tangvalpa ngawng chu kawlh in, a chawp tuntun mai tai. A chawp kawm chun, “Hun kilepsan in, hun thahthamlo ding ka hi a, ka khutte hin hun panpih ka ting, ka hun panpih thei zing apuo!! Na damsung in hun enkawl zing ding ka hi,” a ti a, a kap zawih zawih mai tai.

Tulai nungak khenkhat hin zie tawbang hin a kihuolpihpān vangsietna tuok leh bang a gel ta ding u aw! ! tih ei gelsak thei in ka he’i. (Naomi leh Ruth chancin ei geldawk sak hi).

## THUCHING KHENKHAT

- Thing chuh agah masang in abawk phat ziekin kinem ki'n.
- Vangsaka na um zinglai in, ahun vangsaiku hengilh ki'n.
- Pathien in hunbi a guot hi, a mihiem siemsate a lungsiet ziek ahi.
- Pathien in hunbi a siem hih, a thilsiemte apata limbawl a ut ziek ahi.
- Pathien in hunbi a guot hih, amah I belh theihna ding ua a guot ahi.
- Pathien in hunbi a guot hi, amah I kihchak theihna ding ua a guot ahi.
- Pathien in hunbi a guot hi, a thilsiemte apat thiltup a neih ziek ahi.
- Vangam a khun a genmawite sang in, ginum leh thutaka hingte hin, mun nei zaw'n au.
- Khawvel a mite pahchak ding I hawl bang un, Van ah hawl thei puoi tiu.
- Pathien hih maipha hawla lungdam mai ding ei puoi.
- Pathien a dinga gimtaka sem a, I kingaih zinglai hin, Pathien in ei helo thei ahi.
- I thil piekte mi hetloh khak ding I lauh sang un, Pathien in ei hetpih loh khak ding hi kilau zaw leh.
- Khenkhatte'n a thilhihte mi hetding a lauh zinglai un, khenkhatte'n neucha le a lien thei pen in a sulang sek ui.
- Khawvel a lung-awihna ding na hawl chun, na thih chan inle mu puo'n la.
- Na vahawmna a, mi neukhat, na getkhak chun nang chuh na puma getkhak a um ding na hi.
- Nang lawkna dinga mite na gawt chun, na gawtte sangin nang thuok masa zaw ding na hi.
- Mi cha thi leh I tih chun ei cha a thi sek hi.

**CHAMNA AW PATRON MEMBER LIST**

**CHIEF PATRONS:**

1. Pu S. Paukholal	Chief of Bunglon	1994
2. Ebenezer Chapel	D. Phailien	2014
3. ESC Shillong	Shillong	2014
4. Mr. S.K. Juiliana	Lamphel	2014
5. Nk Sawmte K. Gangte	Fujairah, UAE	2015
6. Nk Esther Tinglekamkin	Gangte Veng	2015
7. Pu Thangzago (K.Vawmcha)	Chiengkawnpang	2015
8. Langol ESC	Langol	2016
9. Mrs Hoisi W/o Laldawng K. Gangte	Jiribam	2016
10. Upa Letkam	Bunglon	2016
11. Pu (L) Kamgo K. Gangte	Phuolsanbung	2016
12. Shillong Local Missionary Board	Shillong	2016
13. Pu Lunkholal Gangte	New Delhi	2017
14. Pu Noksieki	New Lambulane	2018
15. Nemkhola	New Lambulane	2018
16. ESC Gangte Veng M&B	Gangte Veng	2018
17. Nk. Nancy Nemneihvak	Hill Town	2019
18. B. Lalven	Lamphel	2019
19. Ginkhothang S. Gangte	Throilouk	2020

**PATRON MEMBERS:**

1. Pu Henkhojam	Siempat	1994
2. Sep. L. Gangte	5th Assam Regt.	2003
3. Dr. Lalazzadal	Chiengkawnpang	2004
4. Upa Niala	Shillong	2004
5. Pu P. Gangte	Shillong	2004
6. Pu B. Manga	Shillong	2004
7. Pu S.T. Gangte	Shillong	2004
8. Pu Lakithang	Delhi	2004
9. Rev. Dr. Soson	Dimapur	2007
10. Rev. T. Kampu	Guwahati	2008
11. Pi Phalneiththiem	Dehradun	2008
12. Pu B.K. Gangte	Dehradun	2008
13. (L) Hengo	Chief of Chongmun	2010
14. Upa Dr. L.S. Gangte	Chiengkawnpang	2011
15. Pi Niengzalam	Chiengkawnpang	2011
16. Pu Sangvung	Chiengkawnpang	2011
17. Pu S.K. Gangte	Shillong	2011
18. Pu Lovejoy	Kohima	2013
19. Pu Goginthalang	Shillong	2013
20. Pu L. Minlun Gangte	Shillong	2013
21. Pi Lalkim	Shillong	2013
22. Hav. H.L. Gangte	Shillong	2013
23. Ms. Grace Lalbiek	Guwahati	2013
24. Pu L. Neihsiel	Shillong	2013
25. Pu Lamtinlien	Shillong	2013
26. Pu S. Thienlaljoy,	SDO H.Q. Veng	2013
27. Pu L. Sawia	Gangte Veng	2013
28. (L) Lt. Col. L. Gangte	Chiengkawnpang	2013
29. (L) Upa K. Manga Gangte	Shillong	2013
30. Rev.Dr. Th. Lamboi Vaiphei	Hill Town	2015
31. Pu K. Pauboi Gangte	Chiengkawnpang	2015
32. Siemlaljoy	Lamphel	2016

**DIAMOND MEMBER:**

1. Upa Lamkholam	Chiengkawnpang	2015
2. Mrs Felli	Chiengkawnpang	2015
3. Moizokim (Chloe)	Lamphel	2015
4. Pu Lame B. Gangte	Langol	2016

**GOLD MEMBER:**

1. Pi Niengneihchoi	New Delhi	2014
2. Agape Children Eng. Jr.H/S.	Ithing, Thanga	2016
3. Upa Th. Mangnug	Bunglon	2016
4. Pi Chawimawi	Lamphel	2017
5. Pastor Gouliennang & Family	Tripara	2018
6. Muntha ESC	Muntha	2018

**SILVER MEMBER:**

1. Pi Sailothangi Thangzom	Old Lambulane, Imphal	2014
2. Antioch High School Abicharan	Tripara	2014
3. Upa Thanglal	Bijang	2015
4. Upa Laftinthang	Gangpimul	2015
5. Lamneihhat	D. Phailien	2018
6. Pu Sonpee S. Thangzom	Lamphel, Imphal	2018
7. Pu P.L. Manga	Lailak, Mizoram	2018



PIN

--	--	--	--	--	--

# Chamna Aw

(Evangelical Monthly)

Regd. No. 64436/96

E-mail:e7s7c7@gmail.com

[www.synodchurch.com](http://www.synodchurch.com)

Alak man ..... apat ..... ₹ .....

If undelivered pliz return to:

ESC SECRETARIAT,  
Chiangkawnpang, Churachandpur,  
Manipur - 795158

---

*Published by Rev. T. Kongon on behalf of the Evangelical Synod Church  
Printed at THAWNSAUAU PRINTING WORKS, CENTRAL LAMKA*

---